



## Terenga 4: Hōtaka 26 - E toru ngā 'mea'

### He Mihi

Ko te reo o Ako tēnei e mānawa atu nei ki te hunga tautāwhi kua auraki mai ki te timotimo i te kai a te rangatira. Nau mai, e te pīkoko. Nau mai, e te tākare.

### Hei Mahi Whakarongo

Anei tētehi pakeke e kaingākau nuitia ana e ngā ākonga o te motu whānui. E kōrero ana ia ki tētehi o ngā tūpuna rongonui o te waka o Mataatua. Anei ngā pātai hei whakautu mā koutou:

- 1) He aha te kōrero e rangiwhāwhā ana te rangona?
- 2) Nā wai ia?
- 3) He mea whakamoe ia ki tana tāne?

Kia whakarongo ake tātou ki te reo wainene o Te Wharehuia.

### He Whakamārama

E toru ngā 'mea' i puta i te kōrero a Wharehuia:

1. I puta ai i ngā **Mea** o te waka o Mataatua.
2. I whakaaro ake a Toroa, i te **mea** he wā nui tēnei...
3. ...hei huihuinga mai mō ngā **Mea** o Taranaki

Mō te taura tuarua, he rite katoa ngā kīanga reo Māori e whai ake nei ki te kīanga Pākehā, 'because':

I te mea = Nā te mea = Nō te mea = Tā te mea

I te taura tuatahi me te taura tuatoru, he pai te kupu 'mea' hei whakakapi i te wāhi ki te ingoa o te tangata, te ingoa o te wāhi, te ingoa rānei o tētehi mahi. Mehemea kua wareware i a koe te kupu tika mō tētehi āhuratanga, he pai te tiki atu i te kupu 'mea', e rere tonu ai te kōrero.

TANGATA: I kite au i a Mea mā inanahi.

WĀHI: Kia tae atu koe ki Mea, ki Rotorua, ka huri whakakatau ai.

MAHI: Meatia te tīkera.

### Hei Mahi

Tuhia he rerengā kōrero e hāngai ana ki ngā horopaki e whai ake nei. Whakamahia te kupu 'mea' kia rua ngā wā i roto i ia rerenga.

1. kīhini
2. marae
3. akomanga

### Whakautu:

1. Tikina te mea rā hei mea i tō kapu tī.
2. Meatia ngā tūru ki korā hei nōhanga mō Mea mā, mō Kuini mā.
3. Nō te mea koinei te rā whakamutunga o te kura, waiho ngā mea nā ki te taha.